



7. oktoberi 2016

UKA2016/97

**Siunissamut isigaluni pisariaqartitat aallaavigalugit ulluunerani paaqqinnittarfinni atorfinitsitsinernut, ilinniartitaanernut, pikkorissaaqqinnernut ilinniarsimasunillu sulisunik attatiinnarsinnaanermik qulakkeerinninnissaq siunertaralugu UPA 2017-imi periusissanut iliuuserisaassanullu pilersaarummik saqqummiussinissamik Naalakkersuisut peqquneqarnissaannik Inatsisartut aalajangiiffigisassaannik siunnersuut.**  
(Inatsisartunut ilaasortaq Peter Olsen, Inuit Ataqtigiit)

Inatsisartunut ilaasortaq Peter Olsen Inuit ataqtigiit, aalajangiiffigisassamik siunnersuuteqarluni tassalu ulluunerani paaqqinnittarfinni atorfinitsinernut pikkorissaaqqinnernullu periusissamik pilersaarummik saqqummiussisoqarnissaannik Naalakkersuisut peqquneqarnissaannik tamannalu oqaaseqarfigissavarput.

Meeqqanut tunngasut nunatsinni sumi tamani sumiginnaanikkut ajornartorsiuteqarnerput assorujussuaq ilungersunartutut isigaarput, akuersaarumanagulu taamak annertutigisumik meeqqanut inuusuttunullu sumiginnaanerput.

Angajoqqaat meerallit amerlasuut taamak ilungersunartigisumik ajornartorsiuteqarnerat tassalu sumiginnaanermik meeqqanut peqqinnangitsumik inuuneqartitsinikkut akuersaaginnarlugu ingerlaannarsinnaajunnaarpugut.

Kangunaqaaq taamak merannguanut sumiginnarlugit atugaqartitsinerput, sooruna taamaattugut? Sooruna taamak annertutigisumik sumiginnaalluta ingerlanerput akuerinnartutut illugu inoqataasugut?

Imigassamik ikiaroornartumillu ajornartorsiuteqarpugut tupinnaannartumik annertuumik, nalunngikkaluarlugulu sumiginnaanermut taakku pissutaanerpaagaluartut annerusumik iliuuseqarfiginngilagut, ilami imigassamik killilersuinissalluunniit taaneqaannartut niaqqutik issuttuutarpaat isumaqataanningsut taamaliornikkummgooq pissutsit iluarsinavianngimmata imigassarooq killeqanngippat aatsaat ilikkassagatsigu.

Taannaqami ilikkarnialerparput, aammamigooq ilikkarniassagatsigu suli ammasarfiit siviunerusumik ingerlalissasut anguniarparput taamatut isummorsorluni anguniaqarneq uagut tapersinngilarput.

Tassalu ulluunerani paaqqinnittarfinni sulisut atorfinititsinerillu, ilinniartitaanermut tunngasut, pikkorissaqqinnerninnut tunngasut aammalu sulisunik attassiinnarsinnaanerit aaqquissuussinissamik siunnerfillit isumaqatigilluinnarpagut.

Ajornartorsiuterpassuit soorunami atukkagut aamma pissuteqarput inissaaleqinermik suliffissaaleqinermik minnerunngitsumillu aamma aningaasarsiat appasippallaarujussuarnerannik pissuteqarmat tassami nunatsinni akissarsiamikkut appasinnerpaamik inissisimasut amerlasoorujussuuput allaat inuussutigissallugilluunniit amigartunik aningasarsiaqartaramik.

Naligikkunnaariartuinnaq inuttut annertusiartuinnartoq tamattaalluta aaqqinniartariaqalerparput, inuimmi amerlassut inigisaminnut akiliisinnaanerat appasissorujussuarmi inisseqqavoq taamatullu ingerlaannarutta suli ilagut katagarnerulissavagut tamannalu ajorpoq allanngortitariaqalerlunilu.

Tamakkulu pissutsit pitsaanerulissappata isumaginninnermi sulisut atugaasa pitsaanerulernissaat avaqqusinnaanngilarput taamaattumik Naalakkersuisut allanngutissatut siunnersuutaat tassalu suliniutinut tunngasut UKA 2017-mut saqqummiuttussanngorlugit tamannalu tamakkiisumik taperserparput ataatsimiititaliamilu susassaqartumi suliarineqarnissaa innersuussutigalugu.

Hans Enoksen